

32

**Ordenanza municipal  
reguladora da instalación e  
utilización das terrazas na  
vía pública no Concello de  
Mos.**



**ORDENANZA MUNICIPAL REGULADORA DA INSTALACIÓN E UTILIZACIÓN DAS TERRAZAS  
NA VÍA PÚBLICA NO CONCELLO DE MOS**

**EXPOSICIÓN DE MOTIVOS:**

A instalación de mesas e cadeiras na vía pública constitúe un uso común especial do dominio público.

O Regulamento de Bens das Entidades Locais, aprobado polo Real Decreto 1372/1986, de 13 de xuño, dispón no seu artigo 77.1, que o uso común especial normal dos bens de dominio público suxeitarase a licenza, axustada á natureza do dominio, aos actos da súa afectación e apertura ao uso público e aos preceptos de carácter xeral. O artigo 9.7.b do Regulamento de Servizos das Corporacións Locais, aprobado por Decreto de 17 de xuño de 1955, e mailo artigo 44.2 da Lei 30/1992, de 26 de novembro de



Réxime Xurídico das Administracións Públicas e do Procedemento Administrativo Común, aplican a estas licenzas a doutrina do silencio negativo, o que implica que o peticionario da licenza non obستا un dereito preexistente a súa obtención.

Co fin de regular o outorgamento deste tipo de licenzas de xeito que sexa compatible a utilización do espacio público para disfrute e tránsito dos usuarios da vía pública coa ocupación da mesma por parte dos titulares de establecementos de hostelería, apróbase a presente Ordenanza na que se adoptan unha serie de medidas tendentes a buscar un equilibrio e distribución equitativa e razoable do dominio público. Asemade, procúrase adecuar a estética das instalacións ao entorno dos seus emplacementsos co obxecto de dotar dun atractivo singular o espacio urbano da nosa cidade.

## TÍTULO I OBXECTO E ÁMBITO DE APLICACIÓN

### ARTIGO 1.—OBXECTO:

1.—A presente Ordenanza ten por obxecto a reglamentación do réxime xurídico a que se debe someterse o aproveitamento de terreos, tanto de dominio público como privados de uso público, dentro do termo municipal de Mos, mediante a ocupación temporal con terrazas e instalacións análogas que constitúan complemento da actividade que desenvolven os establecementos de hostelería de carácter permanente.

2.—Esta Ordenanza non será de aplicación aos actos de ocupación do dominio público de carácter hostelero que se realicen con motivo da celebración das festas patronais, ferias e festexos populares, os que se rexirán polas súas normas específicas.

3.—Non son obxecto desta Ordenanza a instalación de quioscos ou instalacións permanentes en espazos exteriores de dominio público municipal. Ditas ocupacións suxeitaranse a previa concesión administrativa.

### ARTIGO 2.—INSTALACIÓNS AUTORIZABLES:

Aos efectos desta Ordenanza, entenderase por terrazas, as instalacións formadas por mesas, cadeiras, parasóis, toldos, xardineiras e outros elementos de mobiliario urbano móbiles e desmontables, que desenvolven a súa actividade de forma accesoria a un establecemento principal de hostelería tal como bar, café-bar, cafetería, restaurante ou similares.

## TÍTULO II RÉXIME XURÍDICO

### ARTIGO 3.—AUTORIZACIÓNS:

1.—A implantación destas instalacións require a previa obtención de licenza municipal nos termos previstos nesta Ordenanza e na normativa sectorial aplicable. Prohíbese a instalación de terrazas na vía pública sen licenza municipal. Todas as licenzas outorgaranse deixando a salvo o dereito de propiedade e sen prexuízo de terceiro, entendéndose concedidas en precario. O exercicio da actividade desenvolverase a risco e ventura dos interesados.

2.—O peticionario da licenza non obستا un dereito preexistente a súa obtención, polo que nin a presentación da solicitude de autorización de ocupación de vía pública nin o pagamento das taxas correspondentes, autorizan ao interesado para instalar a terraza.

3.—A instalación de terrazas sen a preceptiva autorización ou sen axustarse ás condicións da licenza, dará lugar a inmediata orde de retirada que, de non ser executada voluntariamente polo interesado, executarase subsidiariamente polo Concello, a custa do obrigado, sen prexuízos

**ARTIGO 4. – SOLICITUDES:**

1. – Poderán solicitar licenza para este tipo de ocupacións, os titulares de licenzas de actividade-apertura dos establecementos de hostelería que linden co espazo exterior que se pretende ocupar, sempre que a actividade se desenvolva de conformidade coas normas urbanísticas e sectoriais que regulan a mesma.

2. – As solicitudes, que se presentarán con un mes, como mínimo, de antelación á data de instalación que se interesa, deberán formularse no impreso normalizado establecido ao efecto, debendo especificar os datos persoais, nome comercial do establecemento e licenza de actividade do mesmo, ámbito temporal da instalación, dimensións da terraza, ancho da beirarrúa libre para peóns, número de cadeiras, mesas, toldos, parasois e demais elementos decorativos.

3. – De tratarse da primeira instalación, a solicitude acompañarase necesariamente da seguinte documentación:

3.a. – Fotocopia compulsada da licenza de actividade-apertura do establecemento de hostelería. A licenza deberá estar en vigor e non atoparse incursoa en expedientes de disciplina urbanística e contaminación acústica que afecten ao devandito establecemento.

3.b. – Xustificante de pago de taxas correspondentes.

3.c. – Descrición do tipo de mobiliario que se pretende instalar. Deberá expresar o número de mesas e cadeiras a instalar e a superficie de m<sup>2</sup> a ocupar. Achegarase unha fotografía do mobiliario e da fachada do establecemento.

3.d. – Plano de situación da terraza, no que se reflecten a superficie a ocupar, a lonxitude da fachada do establecemento, ancho da acera, distancias ás esquinas, paradas de autobuses, saídas de emerxencia, pasos de vehículos, así como todos os elementos de mobiliario urbano existentes na área de influencia da ocupación.

4. – No caso dunha instalación xa autorizada en períodos anteriores, non será necesario presentar a documentación esixida non apartado anterior. O interesado fará constar na súa solicitude o feito de non ter deudas pendentes coa facenda municipal e maila circunstancia de ter realizado instalación de terraza en período anterior, indicando o número de expediente e a data da licenza de ocupación de dominio público, sinalando que se mantén o mesmo titular, a mesma actividade e as mesmas condicións da instalación da terraza. Achegará así mesmo, xustificante do pago de taxas correspondente.

**ARTIGO 5. – PERÍODO IMPOSITIVO:**

1. – Os aproveitamentos obxecto da presente Ordenanza estarán suxeitos ao pagamento das correspondentes taxas establecidas na Ordenanza Fiscal reguladora da taxa por ocupación de terreos de uso público con mesas, cadeiras, tribunas, taboados e outros elementos análogos, con finalidade lucrativa (aprobada no Pleno do 31/10/2011 e publicada no B.O.P. nº 244 do 22/12/2011)

2. – Os períodos impositivos establécense na devandita Ordenanza Fiscal. No momento de facer a autoliquidación, os interesados especificarán o período impositivo polo que optan e para o que desexan obter autorización. En todo caso, os períodos impositivos serán períodos naturais completos.

3. – Cando o interesado desexe continuar coa instalación da terraza autorizada, deberá presentar unha nova solicitude, como mínimo, cun mes de antelación á expiración da licenza de ocupación, logo do pagamento das novas taxas.

**ARTIGO 6. – TRAMITACIÓN:**

O procedemento iniciarase mediante solicitude, en impreso normalizado que conterá, ao menos, os datos sinalados no artigo 70 da Lei 30/1992, do 26 de novembro, de Réxime Xurídico das Administracións Públicas e do Procedemento Administrativo Común (LRX-PAC), ao que se adxuntará, no seu caso, a documentación prevista no artigo 4 da presente Ordenanza, que se presentará no rexistro xeral do Concello de Mos, sen perxuízo do disposto nos artigos 38.4 e 38.9 da Lei LRX-PAC.



Os servizos municipais disporán dun prazo de quince días para examinar a solicitude e a documentación aportada e, no seu caso, requirirán ao interesado para que subsane a falta ou adxunte a documentación preceptiva, con indicación de que se non o fixera teráselle por desistido a súa petición, arquivándose sen máis trámite, cos efectos previstos no artigo 42.1 da LRX-PAC.

Unha vez completada a documentación, emitirase informe da Policía Local, informe técnico e xurídico que finalizará con proposta en algún dos seguintes contidos: denegación ou outorgamento da licenza de ocupación-terraza.

#### **ARTIGO 7.—OBRIGA DE RESOLVER**

1.—O órgano competente para a concesión da licenza é a Xunta de Goberno Local. Sen prexuízo da obriga de resolver, a non contestación do pedimento no prazo de un mes, implicará a súa desestimación tácita a efectos da interposición dos correspondentes recursos.

2.—A concesión ou denegación das licenzas efectuarse en función do cumprimento dos requisitos previstos na presente Ordenanza, das características da vía ou terreo donde se pretende a instalación e das circunstancias obxectivas en cada caso concurrentes e constatadas nos informes que a esos efectos se soliciten. No caso de denegarse a licenza procederase á devolución da taxa autoliquidada.

#### **ARTIGO 8.—SUPOSTOS DE TRANSMISIBILIDADE E SUBROGACIÓN:**

1.—A autorización de instalación da terraza outorgarase a nome de quen ostente a titularidade da licenza de apertura do establecemento de hostelería que linde co espazo exterior que se pretende ocupar. A autorización non poderá ser arrendada, subarrendada, nin cedida directa ou indirectamente en todo ou en parte.

2.—As licenzas para a instalación de mesas e cadeiras só serán transmisibles no caso de cambio de titularidade da licenza de apertura e funcionamento do establecemento principal, sempre e cando o antigo e o novo titular comuniquen dita circunstancia ao Concello, sen o cual quedarán ambos suxeitos a todas as responsabilidades que se derivaren para o titular de acordo co disposto no artigo 13.1 do Regulamento de Servizos das Corporacións Locais.

3.—No caso de falecemento do titular da licenza subrogarase na mesma os seus herdeiros, sempre que se manteña a licenza para a actividade do establecemento principal e a terraza. Dita subrogación deberá ser solicitada ante o Concello, aportando o interesado a documentación que acredite a súa condición de herdeiro e xustificando o cambio de titularidade da licenza de actividade do establecemento principal.

#### **ARTIGO 9.—SUSPENSIÓN E REVOGACIÓN DA AUTORIZACIÓN:**

1.—Cando concorran circunstancias de interese público que impidan a efectiva utilización do solo para o destino autorizado, tales como obras, acontecementos públicos, festexos populares, situacións de emerxencia ou calquera outras, a autorización municipal quedará sen efecto ata que desaparezan ditas circunstancias, sen que xenere dereito a indemnización algunha.

2.—Cando xurdan circunstancias imprevistas ou sobrevenidas de urbanización, así como de implantación, supresión ou modificación de servizos públicos, ou se produzan danos no dominio público, a Administración concedente mediante resolución motivada poderá revogar a licenza concedida sen dereito a indemnización algunha. Igual facultada alcanzará no caso de que da actividade autorizada se deriven molestias graves para o tráfico peonil, se produzan queixas ou reclamacións por parte dos veciños debidamente acreditadas ou denuncias da Policía Local por molestias de ruidos e por perturbación do descanso nocturno.

#### **ARTIGO 10.—VIXENCIA DAS AUTORIZACIÓNS:**

A vixencia das autorizacións de ocupación que se concedan corresponderase co período de funcionamento autorizado. Como máximo computarase o prazo dun ano a contar dende o día da concesión da autorización por parte do órgano competente.

**TÍTULO III  
DAS INSTALACIÓNS****ARTIGO 11.—CONDICIÓNS DE UBICACIÓN:**

As instalacións, deberán cumprir as seguintes condicións:

1.—A colocación de terrazas nas vías públicas deberá en todo caso respectar o uso común xeral preferente das mesmas. En consecuencia, non suporán obstáculo para o tránsito peonil nin poderán perxudicar a seguridade deste ou do tráfico rodado.

2.—A autoridade municipal competente denegará a autorización destas instalacións temporais en calquera dos seguintes supostos:

- cando se incumpran os requisitos esixidos na presente Ordenanza.
- cando a instalación se pretenda realizar en calzada ou zona de aparcamento de vehículos.
- cando supoña un prexuízo para a seguridade vial (diminución da visibilidade, distracción para o conductor, etc.) ou dificultade sensiblemente o tráfico dos peóns.
- cando poida incidir na seguridade (evacuación) dos edificios e locais próximos.
- cando supoña para a súa atención atravesar a calzada.
- cando impida ou dificulte gravemente o uso de equipamentos ou mobiliarios urbanos (fontes, cabinas telefónicas, etc...)
- cando se instalen en xardíns públicos ou comunitarios.
- cando resulte inadecuada ou discordante co seu entorno, por exemplo, menoscabando o interese de edificios públicos ou espazos públicos ou de carácter histórico-artístico.
- cando atópense en tramitación expedientes administrativos de disciplina urbanística e/ou contaminación acústica que afecten ao establecemento de hostelería.

3.—O espazo que ocupen non poderá interromper o paso destinado a usos públicos coma xardíns, aparcamentos, zonas peonís, carrís bici, vados, entradas domiciliarias, paradas de transporte público, aparatos de rexistro e control de tráfico ou calquera outro que impida ou dificulte a prestación dun servizo público, limite as medidas de seguridade, cause perigo ou impida a entrada-saída a domicilios.

4.—As instalacións nas beirarrúas deberán posibilitar o paso peonil pola zona máis próxima ás edificacións establecéndose un ancho mínimo de 1,00 mts a este fin. En zonas illadas, en que exista unha soa terraza e se precise delimitar ou por motivos de seguridade se requiriran, os servizos municipais poderán autorizar, previo informe, a instalación de elementos con este fin, sempre gardando os criterios establecidos nesta ordenanza en canto ao tipo de material, ornato e seguridade.

5.—Deberá deixarse completamente libre de forma inmediata o espazo a requerimento da autoridade municipal, se fora requerido para iso.

6.—Como regra xeral, a instalación da terraza realizarase nunha sola fileira de mesas apegadas á liña de fachada do establecemento a cuxo servizo se destinan, sen superala en lonxitude, e deixarase expedito o acceso ás vivendas e locais comerciais colindantes, non impedindo a visión frontal dos escaparates ou rótulos e instalacións similares de terceiras persoas.

7.—Exceptúanse desta esixencia, as zonas peonís e prazas, onde a colocación das mesas requirirá, en cada caso concreto, un estudio especial, atendendo ao ancho e demais características da rúa ou praza, se ben, non se poderá instalar a terraza durante o horario en que estea permitida a circulación de vehículos para carga e descarga.

8.—As ocupacións a que se refire esta Ordenanza non se poderán autorizar cando o establecemento e a terraza estean separados por calzada de rodaxe de vehículos.

**ARTIGO 12.—MOBILIARIO:**

1.—O mobiliario utilizado nestas instalacións deberá ser acorde coas características urbanas da zona donde se ubique, quedando expresamente prohibida calquera tipo de publicidade en mesas, cadeiras, parasois ou similares. A estos efectos, non se considerará publicidade a inserción do nome comercial do establecemento no mobiliario, manteis ou outros elementos da terraza.

2.—Mediante a publicación do correspondente Bando, o Concello poderá esixir que o mobiliario se axuste a determinadas características estéticas e de uniformidade entre os diversos establecementos, en consoancia coa realidade arquitectónica do entorno. Ditas características poderán ser esixidas tanto ás novas instalacións como ás xa autorizadas.

3.—O material do mobiliario que ocupe o espacio acoutado (mesas, cadeiras, etc) deberá ser de boa calidade, discreto, hixiénico, sen aristas nin saíntes e con certo estilo e deseño. Acéptase o emprego de materiais tales como madeira, aluminio ou enreixado plástico, que xa existen no mercado para mobles de xardinería. Non poderán colocarse cores chamativos ou chillóns. En todo caso, o Concello supervisará e autorizará o mobiliario a instalar na terraza.

4.—En caso de instalar parasois, deberanse suxeitar mediante unha base de suficiente peso, de xeito que non produzan ningún deterioro ao pavimento e non supoña perigo para os usuarios e viandantes. En ningún caso poderán fixarse no pavimento mediante anclaxes, nin a ningún moble urbano como árbores, báculos, farolas ou sinais. Tanto o voo como o pé de apoio quedarán dentro da superficie que ocupa a terraza, debendo ter os toldos e parasois unha altura mínima de 2,20 metros para non molestar aos peóns.

**TÍTULO IV  
OBRIGAS E PROHIBICIÓNS****ARTIGO 13.—OBRIGAS:**

Os titulares das licenzas de terrazas quedarán obrigados especialmente a cumprir o seguinte:

- a.—Dispor das licenzas de apertura, autorización de terrazas e carta de pago, dacordo co determinado nesta Ordenanza a disposición das Autoridades e dos seus axentes.
- b.—Adoptar cantas medidas de seguridade, hixiene e tranquilidade se prevean con carácter xeral nesta ordenanza ou a título particular nas licenzas citadas, para a apertura e funcionamento das instalacións, así como manter o local e o espazo público no que se sitúan estas instalacións en perfecto estado de uso, limpeza e funcionamento.
- c.—Permitir e facilitar as inspeccións que se acorden pola Autoridade e os seus axentes, retirando as terrazas cando o ordenen, dado o uso especial da vía pública.
- d.—Responder dos danos que como consecuencia da instalación das terrazas pudieran ocasionarse e a eles foran imputables.
- e.—Calquera outras obrigacións de aplicación aos espectáculos públicos e actividades recreativas se dispoñan na normativa xeral e sectorial de aplicación.
- f.—Fóra do horario autorizado para a terraza, o titular da licenza virá obrigado a retirar do exterior a totalidade dos seus elementos, incluíndo as bases dos paraseis. A instalación e maila recollida da terraza realizaranse co menor ruído posible co obxecto de garantir o descanso da cidadanía.

**ARTIGO 14.—PROHIBICIÓNS:**

1.—Por razóns de estética, decoro e hixiene, non se permitirá almacenar ou apilar produtos, caixas de bebidas e outros materiais xunto as terrazas, así como tampouco residuos propios das instalacións.

2.—Non se permitirá a instalación de mostradores e outros elementos para o servizo da terraza no exterior desta, que deberá ser atendida desde o propio establecemento.



3.—Non se permitirá a instalación e uso nas terrazas de aparatos audiovisuais, equipos de música, amplificadores e outros elementos que produzan emisións acústicas de calquer tipo.

4.—Prohíbese instalar nas terrazas billares, futbolines, máquinas recreativas, máquinas expendedoras de produtos ou instalacións análogas.

**ARTIGO 15.—HORARIOS:**

O funcionamento das terrazas axustarase ao seguinte horario:

1.—O horario de inicio do funcionamento das terrazas será o das nove horas, non obstante, permítense apilar na rúa (non se autoriza colocar ordenadamente) o mobiliario da terraza desde a apertura do establecemento de hostelería de carácter principal.

2.—O horario de peche será:

- en días laborables e festivos ás 00:00 horas
- en sábados e vísperas de festivos 01:00 horas.

3.—Durante o período comprendido entre o 1 de maio e 31 de setembro, os establecementos poderán ampliar o seu horario de terraza en media hora máis.

4.—O horario de funcionamento das terrazas nas zonas que sexan declaradas acústicamente saturadas polo Pleno da Corporación será o establecido no acordo plenario aprobado ao efecto.

**ARTIGO 16.—MENORES:**

Aos menores de dezaseis anos non se lles poderá despachar nin se lles permitirá consumir ningún tipo de bebida alcolica.

Os titulares, encargados ou responsables dos establecementos nos que se sitúen as terrazas que tiñesen dúbida sobre a idade dos menores que pretendan acceder aos locais ou terrazas, deberán exisirlles a presentación do documento nacional de identidade, como medio para acreditar aquela, puidendo proceder a súa expulsión cando houberen accedido a eles, requirindo, en caso necesario, a intervención da Policía Local.

**TÍTULO V  
RÉXIME SANCIONADOR****ARTIGO 17.—INFRACCIÓNS:**

A efectos desta Ordenanza, constitúen infraccións:

**LEVES:**

- a) A instalación de terrazas e os seus elementos sen axustarse ás determinacións da licenza municipal outorgada ou excedendo os límites da mesma
- b) A falta de exhibición, mediante un marco axeitado ou funda de plástico, o permiso/distintivo correspondente para que poida ser visto e consultado pola Policía Local dende a rúa.
- c) O mal estado das terrazas ou elementos, instalacións ou servizos que diminúan o grado de seguridade e hixiene exisíble e a omisión de medidas correctoras sobre condicións de seguridade e hixiene nas terrazas establecidas nesta Ordenanza o unhas condicións particulares da licenza.
- d) O entorpecemento dos portais, vados, reservas e demais lugares sinalados nos artigos 11 e 12
- e) A instalación xunto ás terrazas ou os seus elementos de calquera posto de venda ou máquinas recreativas sen obter a correspondente licenza ou autorización.
- f) O deterioro leve nos elementos do mobiliario e ornamentais urbanos anexos ou colindantes aos establecementos que se produzan como consecuencia da actividade obxecto da licenza.



**GRAVES:**

- a) A instalación de terrazas e os seus elementos carecendo da preceptiva licenza municipal
- b) A instalación de terrazas quebrantando a prohibición ou suspensión ordeada por esta Administración Municipal.
- c) O despacho ou tolerancia de bebidas alcohólicas para menores de dezaseis anos ou a tolerancia do consumo ilegal de sustancias psicotrópicas ou a falta de diligencia en orde a impedilos por parte dos propietarios, administrados ou encargados dos mesmos.
- d) A negativa ou obstrucción do exercicio de inspección ou controis regulamentarios establecidos segundo á Ley Orgánica de Seguridade Ciudadana no establecemento, terrazas e instalacións.
- e) O incumprimento do horario de funcionamento das terrazas establecido no artigo 16.
- f) O deterioro grave nos elementos do mobiliario e ornamentais urbanos anexos ou colindantes aos establecementos que se produzan como consecuencia da actividade obxecto da licenza.
- g) A ocultación, manipulación ou falsedade nos datos consignados na solicitude o una documentación anexa aportada en orde á obtención da correspondente autorización.
- h) Instalar e usar nas terrazas aparellos audiovisuais, equipos de música, amplificadores e outros elementos que produzan emisións acústica de calquera tipo.
- i) A reincidencia por dúas veces no prazo dun ano de infraccións leves.

**ARTIGO 18.—SANCIONES:**

1.—As infraccións serán sancionadas da seguinte forma:

a.—As infraccións leves, con multa de ata 60 €

b.—As infraccións graves, con multa de 61 € ata 90 €

2.—Con independencia das sancións, o incumprimento das condicións establecidas na licenza poderá dar lugar á suspensión temporal ou a revocación da autorización, atendendo á gravidade da infracción, prexuízo causado, á reiteración, e outras circunstancias que concurran no caso.

3.—Os supostos de reincidencia na comisión de infraccións graves con incumprimento das condicións establecidas na licenza poderían motivar a non renovación da autorización en anos posteriores. Será considerado reincidente quen houbera incurrido en dúas ou máis infraccións graves nos doce meses anteriores.

4.—Será competente o Alcalde para imponer as sancións procedentes, sen prexuízo de que nos termos da normativa de seguridade cidadana, réxime local e do solo e espectáculos públicos, o Alcalde pode ordear a incoación de expediente sancionador independentemente da sanción que proceda imponer por calesquera das Autoridades consideradas en tal normativa.

**ARTIGO 19.—PRESCRICIÓN:**

1.—As infraccións leves prescriben aos seis meses e as graves aos dous anos.

2.—As sancións impostas por faltas leves prescribirán ao ano e as graves aos dous anos.

3.—O prazo de prescripción das infraccións comezará a contarse desde o día en que a infracción se cometese e o das sancións desde o día seguinte a aquel en que adquira firmeza a resolución pola que se impón a sanción.

**DISPOSICIÓN TRANSITORIA ÚNICA:**

As licenzas concedidas con anterioridad á entrada en vigor da presente Ordenanza deberán axustarse ao disposto nela no prazo máximo de seis meses dende a entrada en vigor.

*DISPOSICIÓN FINAL PRIMEIRA:*

A promulgación futura e entrada en vigor de normas de rango superior ao desta Ordenanza que afecten ás materias reguladas na mesma determinará a aplicación automática daquelas, sen prexuízo dunha posterior adaptación, no que fose necesario da Ordenanza.

*DISPOSICIÓN FINAL SEGUNDA:*

Conforme co establecido nos artigos 70.2 e 65.2 da Lei 7/1985, do 2 de abril, Reguladora de Bases do Réxime Local, esta Ordenanza, unha vez aprobada polo Pleno da Corporación, entrará en vigor aos quince días da súa publicación do seu texto íntegro no Boletín Oficial da provincia de Pontevedra.

Mos, a 8 de novembro de 2012.—A Alcaldesa, Nidia María Arévalo Gómez.

**2012010774**

\* \* \*